

物

原





物 原

羅 頤 輯 著

王雲五主編

叢書集成初編

物 原

中華民國二十六年六月初版

輯著者

羅

頤

發行人

王

上海河南路

雲五

印刷所

商

上海河南路

務印書館

發行所

商

上海及各埠

務印書館

物原

明 山陰核軒羅 顧輯著

天原第一凡八條

伏犧始畫卦以造天圖而起數。周文王演爲後天圖而作易。漢焦贛始推卦氣。楊雄始演太玄。宋周茂叔始造太極圖。

伏犧始造龜卜。神農始以蓍筮。漢張良始造基卜。京房始以錢卜。王遠知又制立女課。宋邵堯夫始制拆字及觀梅卜。

伏犧始造干支甲子。周公作納音。漢項仁作六甲推占法。燧人始觀星辰。伏犧制造星官。推步作蓋天。分周天爲三百六十五度。以占日月星辰。軒轅因使容成造授時歷。設占風雲。望氛占歲。擇日及遁甲諸法。堯作渾天。周公作占夢法。漢東方朔始以正月上旬內八日占雞狗羊豬牛馬人穀之吉凶。

伏犧始辨五氣爲四時。爰分陰陽。辨晝夜。神農始分八節。辨弦望晦朔。軒轅始以百刻爲日。分年月日時。元會運世。以十二月配十二辰。制五運六氣之說。堯以閏月定四時而成歲。周公以三十六禽配二十八宿。始分二十四氣七十二侯。

伏犧初置元日。神農初置臘節。軒轅初置二社。巫咸始置除夕節。周公始置上巳。秦德公初置伏日。晉平

公始置中秋。齊景公始置重陽端午。楚懷王初置七夕。秦始皇初置寒食。漢武帝始置三元。東方朔初置人日。唐李泌始置中和節。

夏禹始置九疇。箕子作洪範。周公乃按其法作明堂。始謂之九宮。宋蔡淵始演皇極數。

遂人始觀斗極而定四方。伏犧始置土圭以測景。因定十二支方位。神農始察土宜。辨水性。以定民居。軒轅遂相山川。分地域。此風水室土二家之本也。伊尹始制水平法。而建表以辨方。周公制二十四向。漢王況始制五音宅姓。魏管輅置盤。始擇葬地。

禮原第二凡二十五條

伏犧始定人倫。列五品。制九族。正姓立宗。爲君義、臣忠、父慈、子孝、兄愛、弟敬、夫和、妻柔、男女有別、朋友有信。九族睦婣之方。軒轅始設隣里鄉黨。使相調恤。至秦商鞅變其法。始有分居贅婿之俗。相收連坐之律。燧人始有婦。伏犧始制嫁娶。周公始令同姓不婚。及制婚姻六禮。

伏犧始制飲食之禮。軒轅始制養老之禮。唐堯始置燕享之禮。舜始爲脰臠慶弔之禮。禹始爲鄉飲大飲燕之禮。

軒轅始爲軍禮。顓頊始制大田四時獵禮。周公始制射禮。

唐堯始爲冠禮。周公制三加。

伏犧始制朝聘。軒轅始爲巡狩。

軒轅始制男贊玉帛禽鳥。女贊榛栗棗脩。禹始制進貢方物。

伏犧始制拜揖。周公始分九拜。唐武后始制女拜不跪。古者天子每日視朝。必居明堂。四時各以其方位。閏月則居門。秦始皇廢古制。每五日一入閣聽事。百官起居。正衙立仗。

古者天子朝諸侯。南面而立。秦始皇制御牀而坐。

古者三公與王坐而論道。秦始皇制立侍之禮。漢制賜大臣坐。則開宣室。此後世賜坐所由起也。

古者卿大夫退朝則歸于家。無日夜待命臺寺者。秦始皇制抑臣之禮制。公卿非五日一休沐。則不敢歸舍。伏犧始享神祇。創爲圓丘。方澤。二郊。神農始創禱蜡。軒轅始祭社稷山川。少昊始祭先農先蠶。顓頊始爲表襮之祭。帝嚳始祭日月星辰。寒暑四時。風雲雷雨。舜始類祀上帝。及釋奠釋菜。五嶽四瀆四方百物之祭。禹始大旅上帝。及祭司寒冰神。商湯始祭五祀。周公始祭司命。秦厲。秦德公始祀伏。秦始皇變古制。始行封禪。王莽始合祭天地。唐玄宗始祭九宮神。

伏犧始郊祀皇天后土。神農始大享五天之帝於明堂。堯始以五人帝及五神配享。舜始置五郊迎氣。各祭其方之天帝。湯始置雩以四月。總祭五帝於南郊。周公始以建寅之月祭感生帝於南郊。建申之月祭神州地祇於北郊。

湯以戶竈中霤門行路爲五祀。周公加厲戶司命爲七祀。漢高祖始廢戶而祭井。

伏犧始祭天子郊。神農加明堂祀。舜始以嚳配郊。殷湯始以始祖配郊。周公始以禘配明堂。

伏犧始祀其先。少昊始作宗廟。設四時之祭。舜始作禘。禹始制七廟。行祫祭。帝槐始制不遷宗祭法。殷太甲始以功臣配享于廟。

軒轅始造壇墠。左徹始制祠廟。伊尹始作木主。唐玄宗始造享廟牙盤。

伏犧始爲資父事母之教。軒轅始制喪禮。其期無數。唐堯始定制父喪斬衰三年。父在則爲母齊衰期月。父亡服母喪齊衰三年。夏禹又推設五服。定其輕重之差。巫咸制招魂。周公制庶子父及嫡母在爲所生母服齊衰三月。魯公伯禽始制金革無避。晉襄公始壞喪制爲起復。魯昭公始制慈母服。漢文帝始短喪爲易月之制。唐武后始制父在行母喪亦齊衰三年。

周武王始制追王之禮。晉文公始制追封之禮。

唐堯始制天子諸侯遇災喪則避舍減食。輟朝撤樂之禮。夏少康始制天子諸侯決重囚則減食撤樂之禮。伊尹始制勝國之君忌日則王公卿士並撤樂。梁武帝始制斷屠日。唐高祖始制斷屠日不行刑。

公劉始制下人以酒壽上之禮。楚優孟始制臣見君稱萬歲。漢武帝始制呼萬歲必三聲。謂之山呼。魏宣武始於天子生日設僧齋。唐玄宗始制聖節。

燧人始作樵漁。伏犧始置牧獵。史卜神農始作農工醫賈。軒轅始設奴婢佃戶園丁日者。

伏犧始作媒以交男女。作介以交朋友。女媧始作巫祝以交神人。神農始作僧以通街售。軒轅始作保以通假貸。少昊始作謁以通君臣。夏禹始作譯以通夷夏。

漢文翁始以文學化蜀民。錫光始以禮教化嶺南蠻。唐常袞始以文學化閩人。

名原第三凡二十五條

伏羲始定名百物。始稱天地爲乾坤。辨日月星辰爲四象。神農始定嶽瀆及諸地名。軒轅始定五行、二十八宿、十二次及九州萬國之名。禹始定大山川名。周公始稱天地人爲三才。

伏羲始制人倫鳥獸之名。神農始制土石草木之名。軒轅始制衣食宮室器用人事之名。

凡遠始有人號。伏羲始制人姓名。軒轅始建國號。舜始置廟號。周公加字與諡。死而諱其名。元魏孝文始定氏族郡望。

自軒轅稱國號。始加有字。曰有熊是也。至漢武帝稱國號。改加大字。曰大漢是也。及元人稱國號。又加以皇。曰皇元是也。

自軒轅稱國號。咸因所起地名。至女直入據中國。無以稱其所起。始緣義以建號曰大金。

凡國名。纘氏自伏羲始。至商則改而稱人。

王者貴賤通稱曰朕。周天子自稱曰余一人。秦始皇始制天子自稱曰朕。

燧人始稱皇。少昊始稱帝。禹始稱王。商人始稱天子。周穆王始制稱堯爲皇帝。孔子始稱王爲天王。漢人始稱天子爲官家。司馬遷始稱天子爲上。晉人始稱天子爲大家。

秦李斯始制天子尊號。唐代宗始賜功臣號。宋真宗始制道家尊號。

徐偃王始僭稱王。楚申縣尹闔般始僭稱公。吳伯嚭始僭稱太宰。

戰國之時。貴賤通稱。皆曰足下。秦漢始稱天子爲陛下。太子諸王爲殿下。將爲麾下。使爲節下。公卿牧守爲閣下。父母爲膝下。師傅爲講下。婦人爲簾下。惟比肩稱足下。

古者貴賤通稱。其妻曰妃。周公始稱天子妻曰后。妾曰夫人。諸侯妻曰夫人。卿妻曰內子。大夫妻曰命婦。士庶人曰妻。王公世子曰太子。秦昭王始稱其母曰太后。漢高祖始稱其父母曰太上皇。諸侯母曰太夫人。武帝始稱其祖母曰太皇。魏明帝始稱天子妾。諸王妻。並曰妃。晉哀帝始稱所生妾母曰太妃。

周宣王始稱其女曰公主。諸侯女曰翁主。魏文帝始稱主壻曰駙馬。唐太宗始稱諸王女曰郡主。諸侯女曰縣主。

凡諸官稱師。自伏羲龍師始。諸官稱史。亦自伏羲置史官始。諸官稱監。自軒轅置左右太監始。諸官稱正。自顓頊置南北正始。諸官稱司。亦自顓頊置司徒始。諸官稱大夫。自堯設司徒屬大夫始。諸官稱典。自舜命夔典樂始。諸官稱太稱少。自商湯設太傅少傅始。諸官稱令。自楚若敖置令尹始。諸官稱尉。自晉武公置軍尉始。諸官稱丞。自秦獻公置丞相始。諸官稱郎。自秦武王置常侍郎始。諸官稱事。自秦始皇置給事始。諸官稱使。自漢武帝置都水使始。諸官稱知。自後魏太武置參知政事始。軍官稱都督。自漢光武置督

軍御史始。稱指揮使。自唐僖宗以左右神策軍大將軍爲左右神策軍都指揮使始。漢光武初以御史督軍謂之都督。魏明帝遂稱大將軍爲都督。唐高祖又稱州牧爲都督。

漢成帝始稱方伯爲州牧。亦因唐虞制也。後周改稱總管。唐改稱都督。元改稱平章。今爲布政使。漢文帝初置刺史。唐中宗改稱巡察使。睿宗改稱按察使。玄宗改稱采訪使。肅宗改稱觀察使。宋改稱提刑。元改稱廉訪使。

秦始皇始稱京郡守爲內史。漢景帝始稱王國守爲內史。武帝改稱京郡守爲尹。成帝始稱王國守爲相。隋始稱郡守爲刺史。宋太祖改稱知州。高宗改稱知府。元改稱總管。晉劉淵始稱華人爲漢子。桓立始稱俗人爲獠子。

人始稱帝都爲京師。楚文王始稱邑爲縣。漢武帝始稱巷爲坊。宋太祖始稱里爲保。今稱保爲圖。鄉爲都。漢武帝始稱州爲部。唐太宗改稱道。宋太祖改稱路。元世祖改稱省。

隋文帝始稱郡爲州。唐玄宗始稱州爲府。元世祖始稱府爲路。秦稱御史署曰府。漢明帝始稱憲臺。今日院。

漢謂丞相將軍御史三府爲三司。唐始謂鹽鐵度支戶部爲三司。今始謂大理刑部都察爲三法司。都指揮布政按察爲三司。

樂原第四凡六條

伏羲始作樂而辨五音。其臣葛天制歌。陰康制舞。軒轅臣伶倫始定律呂。伏羲始制琴瑟。女媧加之以笙竽。神農加以鍾鼓。軒轅使伶倫作笛。母句作磬。帝嚳作塤箎祝敔。堯作缶。

舜作簫。此爲雅樂之器。紂使師延作笙簧。老聃作胡笳。秦蒙恬造箏。漢烏孫公主作琵琶。晉阮咸作阮。宋識作拍板。梁武帝作響板。此爲俗樂之器。

伏犧始作五絃琴。周文武各加一絃爲七絃琴。此爲雅琴。晉孫登作一絃琴。嵇康作嵇琴。梁柳惲作擊琴。此爲變調。

神農作鍾。軒轅臣榮援作鐃鍾。禹作鐸。湯作鐸。

神農作鼓。帝嚳作鼗。禹作鞀及篥篥。

伏犧始制旄舞。軒轅始制干羽以舞。戰國始制執拂如意之舞。

政原第五凡二十五條

燧人始爲教令。伏犧始立正朔而建子。軒轅始定服色。秦惠王始重改元。漢武帝始立年號。

伏犧始以木德王。鄒衍始推五德之運。漢劉向始推五德生勝。有正閏之辨。

燧人始立朝廷。伏犧始建都立家。軒轅因造成郭溝池街巷。堯始立巷牌。

燧人始立教臺。神農始作明堂。軒轅始作靈臺。舜加辟雍。禹作冀闕。周公始備九門。

神農始以日中爲始而立曆。湯始設關。周公始制關市之征。管仲始稅魚鹽。齊景公始置山海池澤園林之稅。漢文帝始稅酒。武帝又加稅商舟車皮鐵糟醋及契本。唐太宗始稅草。趙贊始稅竹木及茶漆。裴延齡始爲和買。

管仲始稅□□桑弘羊始禁私鹽而官賣。唐玄宗始給商貨引。

舜始立學。魏曹芳始以顏回配孔子于辟雍。唐高祖始立孔子廟於學。太宗加以先賢配享。

軒轅始制圉以爲演武場。唐太宗始立呂望廟以古名將配享。武后始制武舉。宋仁宗始制武學。

周公始立貢士法。漢文帝始置賢良科。武帝始置茂才孝廉明經三科。漢宣帝始置童子科。隋煬帝始置進士科。

漢文帝始以策試取士。武帝加問經疑。左雄加章奏。梁武帝始以詞賦。唐太宗加律判及詩。德宗加論及詔誥。漢武帝始設殿試。唐太宗始設鄉試會試。武后始彌封。中宗初分三場。玄宗始令禮部知貢舉。宣宗始置登科錄。唐明宗始印卷。宋太宗始唱進士名。分爲五甲而賜燕。及置試院巡綽監門官。眞宗始印題。

神農始制儀仗。用斧戟鞭笏。軒轅始制出警入蹕。設侍衛。執鉞二人。執槌十人。謂之虎賁。卽今鎮殿將軍力士也。漢武帝始制障扇十二把。晉武帝制班劍白幹鎗。元帝加儀刀御刀。軒轅作鉞。秦始皇改爲鎗。

漢武帝始制雉尾扇以障御容。宋孝武始制朱團扇以障侯王。

周公始制五輅載太常。以記里指南二車前導。作鍛爲侍衛。有屬車十二乘。呂望加曲蓋。晉文公制左右虞候以掖駕。秦始皇初作鹵簿三駕。爲金根車。上施華蓋相風鳥。設辟惡車前導。定制大駕屬車八十一

乘。法駕三十六乘。小駕則因周之舊。漢武帝益以轎弩金吾。鸞旗車。皮軒車。設黃鉞車。左右旄節十六。罕畢二旗。前後黃麾。睥睨蓋并御馬。分左右爲羽儀。其屬車最後一乘。懸豹尾。本周置。自豹尾以前爲省中。晉武帝始制五牛輅。赤青二麾以爲羽儀。後魏孝文帝始令民以錢贖罪。秦始令民納粟買官。唐楊國忠始令民納粟度僧。

伏犧始統萬國。軒轅始分九州。裂土以封建。堯始分五爵。禹始置五服。秦昭王始封爵以戶。秦始皇始并天下。因六國之制。設爲郡縣。漢宣帝給侯以俸不實封。魏文帝始以鄉亭封公侯。郡邑封王公矣。

軒轅始置封建。舜始制世祿。

堯始考功。後魏崔亮始限年。

軒轅始給官吏胥徒俸及賞賜。周公始置恩例。漢文帝始給太子櫝食。唐太宗始給常朝官廊餐。武后始借賜下官緋紫。德宗始折俸。

軒轅始設戶口圖籍。周公始置租庸調及蠲役法。秦始皇始制幫役法。北齊高澄始定九等戶役爲均徭。其不點差者令納庸布。此宋丁錢所起也。

官原第六凡三十八條

伏犧始立百官。堯始分大夫士爲五等。周公始設九命異賜。又制人爲十等。田襄子始分文武異任。商鞅始置資級。魏陳郡始分九品。後魏始定九品正從。每品分上下階。蘇綽始分士途爲二流。

商湯始設公孤。秦始皇始以丞相、太尉、御史大夫爲三公。其署謂之三司。亦曰三府。至漢武帝改太尉爲大司馬。成帝改御史大夫爲大司空。哀帝改丞相爲大司徒。是以周之三卿爲三公矣。其失自秦始皇始也。伏犧始置二相。又任襄英爲左右。若唐虞之百揆。商之太宰。周之冢宰。皆相職也。至秦獻公始稱丞相。莊襄改稱相國。至漢武帝不以朝政付宰相。始置尙書令。典樞機。其任蓋猶義皇之襄英。周官之卿士也。武帝崩。霍光以大司馬當國。領尙書事。於是遂以大臣領尙書。而大司馬之職。班宰相上。尙書令之權。重於宰相矣。至成帝始以特進張禹錄尙書事。蓋以三公下兼卿士之職也。自是遂以錄尙書爲首相之稱矣。靈帝始以宰相胡廣爲太傅。自是遂以太傅爲首相之稱。至魏文帝以中書令。晉武帝以尙書令。宋文帝以侍中。並始爲相職。北齊始置尙書行臺。此宰相初有分司也。隋文帝始以侍中。中書令爲上相。僕射爲次相。唐太宗因後魏制。以他官行相事。謂之參知政事。同平章事。同中書門下三品。其後遂俱以爲直宿之稱。中宗又置平章軍國重事。則古三公兼宰相之職也。玄宗改侍中稱黃門監。宋神宗又以尙書左右丞爲執政官。徽宗加宰相太師之稱。自是首相多稱太師。元世祖始制參議官。及中書行省。行省卽北齊行臺也。

國朝洪武中始罷丞相不置。尋又以文淵閣掌機密。宋太宗始以宰相監修國史。唐莊宗始以平章事兼樞密使。謂之使相。

周公置常伯。至秦始皇改令丞相。史典、殿中、章奏。謂之侍中。而置黃門郎、散騎二官。與中常侍爲之。副黃

門郎亦曰給事。其中常侍散騎，則或以寺人爲之。自是侍中屬僚，參用士寺二流矣。後漢稱黃門郎爲侍郎。至靈帝始置侍中寺。魏文帝合散騎常侍爲一官，而改用士人。又分侍中太僕之職，置殿中監。自是士人給事者居侍中寺。黃門令、中常侍、諸寺人，則皆居殿中監。晉武帝始改侍中寺，稱門下省，亦曰北省。至宋文帝遂以侍中爲相職。隋文帝改侍中稱納言。唐玄宗始改門下省爲黃門省，侍中改稱監。

顓頊始置納言。周公改稱內史。秦始皇中書謁者，時官甚卑，不置令。漢武帝始置中書令，領尚書事。尚以寺人爲之。置丞郎爲屬，位雖卑而權已重矣。成帝始易任以士人。魏文帝始立中書省，稱中書郎爲侍郎。其屬添置都通事。晉武帝始設中書令人。隋文帝復中書令稱內史。唐裴炎始置政事堂於中書省。凡三省官議政必集中書。玄宗始以中書舍人爲知制誥。後遂專以知制誥名官。宋太祖定制宰相之府，謂之中書省。其官有中書令，有左右僕射，有門下侍郎。蓋兼三省官於中書一省也。

周公始置司會。秦始皇改令少府史主發行殿中書，謂之尚書門下卑員。漢武帝始置尚書令，以統諸尚書及屬郎。與中書宦官共典樞機。其任遂與周之卿士相並矣。至成帝又設僕射，及左右丞爲尚書令屬。置尚書臺。僕射者，本戰國諸侯侍僕射役之稱。秦遂建爲官號。而漢於侍中謁者尚書博士郎等官，咸置其員。光武又分諸尚書爲六曹，各置侍郎。郎中爲之貳。遂以令僕及六尚書爲八座。侍郎、郎中，卽屬郎也。本秦諸郎趨走殿陛而屬於郎中令者。自漢武帝已置尚書令，則尚書諸郎咸不隸郎中令矣。黃門中之有侍郎也亦然。晉武帝改尚書臺爲省，亦曰南省。遂以尚書令爲相職。隋文帝以令僕係相職，不與六曹

同。乃以左右丞及六曹爲八座。分屬郎爲二十四司。各添設員外郎以佐郎中。謂之子司。隋煬帝又於子司各置主事以副員外。主事者。本漢吏役之稱。武帝於光祿勳置南北庭主事是也。後魏始分尙書諸司。各置主事令史。至隋旣定。令爲二十四司。遂去令史之稱。但曰主事而已。其二十四司。吏部四司。一曰選曹。卽今文選司也。置自漢之常侍曹。二曰封曹。卽今驗封司也。本漢光武因古執秩之官而置。三曰勳曹。卽今稽勳司也。本字文泰。因周禮司勳之職而置。四曰功曹。卽今考功司也。亦本漢光武所置。戶部四司。一曰民曹。二曰計曹。三曰金曹。四曰倉曹。并魏文帝所置。禮部四司。一曰儀曹。卽今儀制司也。本字文泰所制。二曰祠曹。卽今祠祭司也。本魏文帝所置。三曰客曹。卽今主客司也。本漢成帝所置。四曰膳曹。卽今精膳司也。本晉文帝所置。兵部四司。一曰武兵曹。卽今武選司也。本魏文帝所置。二曰職方曹。卽今職方司也。本字文泰所置。三曰駕曹。卽今車駕司也。四曰庫曹。卽今武庫司也。並魏文帝所置。刑部四司。一曰賊曹。本漢光武所置。二曰都官曹。本漢成帝所置。三曰比曹。亦魏文帝所置。四曰門曹。本字文泰所置。工部四司。一曰起曹。卽今營繕司也。本漢元帝所置。二曰虞曹。卽今虞衡司也。虞衡本虞書周禮建官。三曰水曹。卽今都水司也。虞水二司並亦魏文帝所置。四曰屯曹。卽今屯田司也。亦本漢成帝所置。隋煬帝又設尙士左右司。郎中員外。以副左右丞。謂之都官。唐罷尙書令。惟設僕射以下官。宋神宗升左右丞爲執政。左右丞遂居六尙書之上矣。高宗罷左右僕射。惟設左右丞以下官。國朝盡罷左右丞及都官。單設六部。其尙書侍郎郎中員外主事之職。並仍漢隋舊制。惟有戶刑二部事繁。乃廢八司舊名。各設十三司。

名皆按所屬布政之名焉。

夏禹始定六卿。周公加以殷湯所置三孤，謂之九卿。夫六卿冢宰之職，起於伏羲，而銜定于周。若司徒、司馬、司寇，則軒轅之雲官；司空，則少昊之鳥官。已並有其職，但名銜則起於顓頊之秩宗，命以民事爾。宗伯之官名，雖亦始於周，然其職實顓頊之秩宗，故六官之職，皆創設於唐虞之前，而以三孤六官爲九卿，則殷周之制也。至秦始皇壞古制，乃以奉常、宗正、郎中令、衛尉、太僕、廷尉、典客、治粟內史、少府爲九卿，各置丞以副之。而於衛尉置主簿，其署則曰九寺。漢景帝乃改奉常爲太常，廷尉爲大理，又改郎中爲光祿勳，典客爲鴻臚，治粟內史爲司農，置光祿主簿。成帝始置太常主簿。魏文帝始置大理主簿。晉武帝始置司農少府主簿。梁武帝始置宗正太僕、鴻臚主簿。後魏孝文又各置少卿。太常卽周宗伯，廷尉卽周之司寇，其爲九卿宜也。若宗正，則周官小司馬之屬，衛尉掌畿卒之官，郎中令蓋諸郎之長，太僕亦周官大司馬之屬，鴻臚卽周官之大行人，治粟內史亦司徒之屬，卽少昊之農正也。少府乃冢宰之屬，無非所以爲九卿也。秦之九寺，至元罷其四，所存惟太常、光祿、太僕、大理、鴻臚五寺而已。其宗正之職，今更爲宗人府，令位至一品矣。改寺爲府，實宋始也。衛尉今爲錦衣衛官，其職司元置之，以代衛尉之任。司農少府之職，卽自是廢矣。

秦始皇初置大理正。漢宣帝初置平，至隋煬帝稱評事。秦始皇初置大官令、太祝令。漢文帝始置籍田令、陵臺令。武帝始置協律奉禮二郎。魏文帝初置太常齋郎。梁武帝始置郊社令。